

स्याना

प्यो

भलेआं

अड़दे

भरोटा

गल्ल

गलाया

मुड़ी

जुट्ट

जने

नेड़ा

लोक




अज्ज तुसेंगी गल्ल सनान्नां,
इक करसान हा बड़ा स्याना।
होआ इक दिन बड़ा बमार,
पुत्तर बी हे ओह्दे चार।
पर रौह्दे हे सदा ओह् लड़दे,
गल्लै-गल्लै पर ओह् अड़दे।

उसनै इक दिन उ'नेंगी सदाया,
प्रेम दे कन्नै फही समझाया।
दिक्ती उ'नेंगी इक-इक लकड़ी,
लेई सारें हत्थै बिच पकड़ी।
फही गलाया गल्ल एह् मन्नो,



सब जने हून इ'नेंगी भन्नो।
पलै च सारें भन्नी ओड़ियां,

आनियै प्यो दे कोल छोड़ियां।
 प्यो ने फही इक बद्धा भरोटा,
 गलाया मुड़ी करो टोटा-टोटा।
 सारें लाया जोर बथहेरा
 बिंद भरोटा होआ निं नेड़ा।
 खीर ओह सारे अक्की-पक्की,
 प्यो कश पुज्जे भलेआं थक्की।



प्यो नै आखेआ सुनो हून गल्ल,
 तुं'दी लड़ाई दा होई गेआ हल्ल।
 इ'यां जे होई जाओ इक-जुट्ट,
 मिटी जा तुं'दी सारी फुट्ट।
 लोक निं तुसेंगी र्हाई सकदे,
 तुस सारें गी ढाई सकदे।

अभ्यास

1. हेठ लिखे दे सुआलें दे जवाब लिखो :-
 - (क) करसानै दे किन्ने पुत्तर हे?
 - (ख) पुत्तरें दी लड़ाई खत्म करने लेई करसानै ने केह तरकीब बरती?
 - (ग) “इक-इक लकड़ी त्रुट्टी गई पर भरोटा नेई त्रुट्टेआ” इस शा केह शिक्षा मिलदी ऐ?

(घ) एके दा केह् म्हत्तव ऐ?

उद्देश्य : पाठै दा चेता दर्हाना।

1. हेठ दित्ते दे शब्दें दे वाक्य बनाओ :-

- भरोटा
करसान
स्याना
हत्थ
अड़ना
पुत्तर
लड़ाई
फुट्ट
टोटा
जोर

उद्देश्य : वाक्य-रचना दा ज्ञान।

2. अधूरे वाक्यें गी पूरा करो :-

- अज्ज तुसेंगी गल्ल सनान्नां
इक करसान हा
होआ इक दिन
पुत्तर बी हे
उसने इक दिन
प्रेम दे कन्नै

उद्देश्य : स्मरण-शक्ति दा विकास।

3. पढ़ो, समझो ते लिखो :-

करसान	स्याना	बमार	पुत्तर
.....			
समझाया	भन्नी	कोल	भलेआं
.....			

उद्देश्य :- पढ़ने, बोलने ते लिखने दा अभ्यास।

4. इस कविता गी चेतै करियै जमाता च सनाओ।

उद्देश्य : स्मरण-शक्ति दा विकास ते काव्य-पाठ दा अभ्यास।

5. पढ़ो ते लिखो :-

इ'यां जे होई जाओ इक-जुट्ट

.....

.....

मिटी जा तुं'दी सारी फुट्ट

.....

.....

उद्देश्य : कविता-पाठ दा अभ्यास।

अध्यापकें आस्तै निर्देश

इस पाठ च गलाया, सदाया, अड़दे, लड़दे बगैरा क्रिया-शब्द बरतोए दे न। अध्यापकें गी लोड़दा ऐ जे ओह विद्यार्थियें गी क्रिया-प्रयोग बारै लोड़चदी जानकारी देन। जि'यां :-

अड़ना	—	अड़ेआ		अड़दा		अड़ग
लड़ना	—	लड़ेआ		लड़दा		लड़ग

इस्सै चाल्ली होर क्रियाएं दे बी उदाहरण देओ।